

河
上
楮
談

河上楮談卷之三

新淦朱孟震東隱者

停雲小志

易有云二人同心其利斷金同心之言其臭如蘭大戴禮云與君子遊苾乎如入蘭芷之室久而不聞其香則與之化矣震少也寡昧自入官來始得從學士大夫遊又幸諸學士大夫不以爲寡昧而與之進以故竊同心入室之誼時自濯勵於今十餘年計所託爲知交者彬彬乎盛矣比來關內山齋長日無事索

居緬懷舊契南北各天每一停雲不勝馳結
夏五月天雨十日閉戶因追憶爾時丰神意
度及所贈荅篇咏人畧疏其大槩手自錄焉
命曰停雲小志蓋在南北部曹所與遊得若
千人青溪社倡和得若干人由渝入計都下
得若干人間一握手接袂上下其議
論又若嘉鍾亭玄湖坐邀笛閣對西山爽氣
社芻而歌呼嗚嗚也宣父言魯無君子斯焉
取斯震誠非其人也顧今海內熙明賢俊濟
濟布列朝野魯之君子詎足多歟焉今卽余

寡昧而輒引之於君子之列固不敢當然他日因諸君子而幸竊附於古之人亦安敢遽自棄也知我罪我其亦有概於斯焉

胡憲使

文化名維新

餘姚人初為御史有直

聲坐是謫為寧州判後稍遷南刑曹即為人剛毅介特至與人交又和易其所喜者即吐肺腑示之在曹中與余最善有雋才喜蓄異書人有才輒稱說不置書有副本即以與人亦不吝也性不能飲然喜人飲刑曹在南中僚友最稱輯睦每花時諸曹即輒引觴賦詩

文化獨從余三四人日為會時山東曹張太
守志汝憲使汝賢湖廣則顧憲使襄廣東
則解給諫宋王郎中執禮福建則陳太守師
陝西則鍾憲使繼元解家興化又多携嘉酒
來會中或奕或咏或談古書或諧譁各從所
欲余時稱能飲然不敢盡醉諸君輒藏其帶
俾不得去一時忘形爾汝然各以職相勸勉
亦不至廢曹事文化有牡丹杏花諸詩今在
貴州司稱清麗有風韻余嘗贈之詩曰無多
酌我黃金爵且少探君白雪篇又留醉因藏

帶敲詩共倚闌蓋道其實也今十年矣一時
交好萍聚星散令人不勝伐木之思云

陳思貞

名師

錢唐人以國子博士為南刑曹

即喜古文詞為詩直寫胸臆性恬靜寡營與
人交澹如也而情愈密嘗作石文侯傳得毛
穎家法家故貧然在曹即慎取于布衣蔬食
致自樂也客至命酒則又極致豐腴必盡其
歡云曹有獄將上乙託所親置百金求為解
即白其事司寇竟置于法其奉公持正多此
類也嘗為論交篇贈余幾數百餘言為永昌

太守有大保山集丁丑入觀觀事畢引疾致仕去

曹以漸名子登京師人與思貞同署先後為

郎余初入比部以漸獨與余談詩後思貞至

而署中稱二妙矣一日署蠟梅盛開以漸呼

小史折梅來索余詠因共命酒倡和連日以

漸尋擢鄖陽守去思貞後當梅時每集同舍

花下余對花未嘗不思以漸也歲丙子余入

計以漸為憲使謁選天官曹僅一再晤已復

丁母夫人憂余遊西山以漸不及行乃和余

詩而述其意具在倡和編中以漸兄萊州守
名子朝尤多情致余嘗贈之詩云龍馬雙馳
異野寬眼中兄弟似君難後以漸為東昌而
兄為彰德守余過彰德詩云朋友舊憐寒范
叔弟兄今是大馮君今誦之心以馳於碣石
矣

江子望名圻錢塘人余同門友也以春秋魁
北京丙午鄉試戊辰舉進士授南刑部河南
司主事子望家世最盛祖瀾禮部尚書父曉
贈工部尚書叔父暉翰林庶吉士子望居閑

顧自謙抑衣布素食簾糲不知其為貴公子也閨門相敬如賓於同年中尤敦厚太常博士左經卒于宦子望偕余三四人躬為歛送哭之如同胞親其家遠不能歸又為資助之其於交道類若此余在曹中子望最相友愛卽家人憂戚喜慶未嘗不相聞自舉鄉試时才名最高然益自晦居官恬靜一無所營歲壬申書三年考時廣西督學員缺高相公儀亦錢唐人也素知子望乃力薦之子望不知也在廣西一年以疾致仕歸卒子鐸舉甲戌

進士為北刑部主事行誼亦如子望云

蔣伯孝常熟人名以忠余同年以長樂尹入

為南比部廣西司主事伯孝才名久著為諸
生時所著藝苑琳琅已為海內傳誦為長樂
最有聲同時州縣皆入據津要乃伯孝獨為
郎比部又在南人咸少之伯孝碩獨恬然自
得不為意也時從曹中讀古人書沉醉竟日
夕發為文雄贍迭宕有司馬氏風又性不耐
齷齪治家人生產居常俸入僅足自給一日
聞封君疾棄官歸貧不能治喪事乃獨捐所

受田業易貲為葬具不以累二弟又不給則
令其室脫簪珥易之其孝友清謹每如此余
領渝守伯孝為文送之又策馬江干握手泣
別不能出一語伯孝所為治邑狀居間一一
為余言余心師之余治渝所聞於伯孝者大
畧循之籍是寡過與乎若伯孝者古所謂蘭
芷之室者非邪

袁魯望 吳人名尊尼父求之先生有聲吳下

魯望克紹其家學才情雅麗而於交遊最厚
余自太學游已識魯望後余為比部而魯望

為考功郎考功在南部稱尊貴他曹郎率嚴
憚之乃魯望顧存念余不置余為詩魯望輒
為評校不作時俗語相許可嘗以書規余云
作詩才短者乃須容易才長者必求穩妥雅
調不牽於俗俗調不合於雅難易雅俗之間
不可不辯也蓋余初為詩往往率易而近俗
魯望之言不啻良藥之於膏肓矣魯望為郎
久嘗贈余詩曰神駿逸羣方振蹕倦禽垂翅
尚回翔未幾擢山東提學副使引疾歸卒鳴
呼魯望已矣安得斯人復訂吾文者耶為之

三嘆

張德南名煒閩人初為南大理司務署中有
奇竹二產簷下已乃屈曲循簷出德南援筆
為瑞竹賦諸郎競傳詠之又善書諸以便面
從乞書者屢滿戶外詩喜為平澹一日舍中
芍藥盛開乃命酒招余飲取薔薇和麪煎之
佐酒極有致又邀余從南城諸寺玩月極歡
而罷以事註誤謫稍遷為龍安推官以歸余
為渝州守復會于蜀寄余詩云白下悲歌送
我行西風逐客淚沾纓百年盟好耽風雅萬

里羈栖憶弟兄蜀郡兒童迎使節閩洲蝦菜
計歸程相看咫尺難相晤山自青青鳥自鳴
梁彥國順德人名柱臣為大理評事而師事
黃才伯先生又與梁公實比部黎惟敬秘書
歐楨伯博士結山中社壯乃從仕以母老乞
南後又徙北其詩一以古為憲鄧中陳玉叔
叙彥國稿謂欲以片言明百意坐馳役萬景
盖知言云彥國有寶劍吟贈余云豫章有龍
劍紫氣干斗牛至人識其精豐城遂奇搜感
君重意氣持贈結綢繆啓匣已電發麾鐔忽

星流太乙曾下觀風胡將見求應同櫛具佩
持向漢庭遊慙非張公子靈貺焉可酬

青溪自後湖分流與秦淮合當桃葉淮清之
間有邀笛步者晉王徽之邀桓伊吹笛處也
陳明府芹卽其地為閣焉俯瞰溪流頗有幽
致歲辛未費叅軍懋謙約余為詩會其上於

是地主則明府次則唐大學資賢姚典客潮

胡民部世祥華廣文復初鍾叅軍倬黃叅軍

喬棟周山人才甫盛貢士時泰任叅軍夢椿

先後遊而未入會者則張大學獻翼金山人

鸞黃山人孔昭梅文學鼎祚莫山人公遠三

山人寅黃進士雲龍夏山人日明紀亳州張

東陳將軍經翰汪山人顯節汪文學道貫道

會沈太史懋學程文學應魁周文學時復癸

酉復為續會則吳文學子玉魏廣文學禮莫

貢士是龍邵大學應魁張文學文柱每月為

集遇景命題卽席分韻同心投分樂志忘形

間事校評期臻雅道前會錄詩若干刻之命

曰青溪社稿許石城先生叙其首續會錄詩

若干吳瑞敎序之會余領渝郡符任叅軍入

興都稿遂散逸後方民部沅葉山人之芳入
焉余馳書社中期稍收輯無何胡民部費叅
軍以誼誤謫黃叅軍以領郡行已方戶部亦
因事出盛會不常良朋星散回晉江東雲樹
在望秦淮烟月黯爾銷魂因記舊遊畧次其
姓氏篇什如左記以至先後為次無論盛序
詩紀一時遇合其工拙亦非所敢擇也

陳子楚名芹金陵人為長沙令九十日解印
歸卜居鳳皇泉之左又構別業新林浦時垂
綸其上浦有橫厓因自題曰橫厓小隱又卽

邀笛步為閣其上曰邀笛閣而引騷人倡咏
為樂善墨竹意所到揮筆點染若不經意而
神韻自別人爭寶之喜為章草佳處頗逼真
所著有陳子楚集二卷又取古高士自巢許
而下迄于宋元得七十餘人人為之詩以自
見其志號思古吟并前社稿中詩多不具錄
其喜諸君子入社詩云邀笛亭前舍釣竿丹
楓林外候金鞍吟邊綠酒今逾暖花底幽盟
久未寒才子一時追鄴下故人幾載隔雲端
諸君莫更輕離別萍跡應憐此會難詠美人

走馬云明妝驅駿足晴日麗春風各倚千金
貴齊驕三市中扁遷疑舞鳳恍忽似遊龍一
盻揚鞭去幽情已自通窓中度落葉云靜聽
高林響還過虛牖前蕭條如帶雨閃爍似含
烟孤影隨飛鳥寒聲和晚蟬妝臺有思婦相
對惜華年鳳皇臺社會云鳳皇泉上瑞烟
輕自煮新泉待友生賴有香茶將一盃殊無
旨酒速諸兄賡酬會意思投轄湖海論交惜
聚萍莫以更闌問歸路秦淮東畔月初明秦
淮烟月云淮水平如江水平今人情似古人

情英雄滾滾隨波去留得波間此月明秦淮
烟暝水長流明月空懸萬古愁春去秋來風
景別鳴箏不下酒家樓折欄會和周銀臺云
新歲詩豪集深更興未闌共憐今夜月仍似
去年看杜主歡投轄車徒怨折欄綵梅紅對
酒忘却外邊寒鳳皇臺上憶吹簫云有人春
日登高臺扁遷綵服從風來忽舒玉指吹玉
簫花風千林天上飄衆賓各進酒一瓢竹音
稍停繼以肉盡道鳳鳴在山麓彩霞垂天日
西沒衆賓大斗飲不足鳳兮鳳兮勿飛去嘉

爾靈禽在南國長干曲云長干女兒茜裙新
琵琶一曲驚千人三吳少年豪傑士醉待梅
樹回陽春春風一夕朱英發珊瑚枝頭挂明
月茜裙挽住五花驄梅花落盡歡永歇感別
送朱比部云使節三年野老家鳳皇泉水自
煎茶今日西川成遠別金尊空對碧桃花離
筵花雨亂紛紛宛轉情言到夜分巴峽聞猿
應憶我江樓望月正思君聞笛有懷朱比部
云空林索莫雨絲絲坊得梅花未放枝正是
鄰家夜吹笛倚闌無限故人思虛堂夏日有

懷朱重慶云虛堂白日永竹樹陰相錯纖蘿
無風吹嫋嫋隔簾箔乳雀巡簷來翻皆映紅
藥時有屋上雲涼氣從空落瞻雲思友生竟
日坐寂寞蜀山修且阻雙鯉何由託

姚典客原白名淵家金陵武定橋以貲入為

即久之辭疾歸性好吟就所居構市隱園水
竹之勝甲于白下時時招詞人墨卿觴咏其
內醉取古墨玩之時引筆作真草數幅雅有
致晚好作梅從閩王山人遊盡得其妙子之
裔為郡博士弟子員亦能詩其邀笛閣喜諸

君子入社云青溪文酒已三秋復喜羣公集
水樓藻思久傳鸚武賦芳時今逐鳳皇遊寒
花照座金為蕊明月窺簾玉作鉤夜靜忽聞
三弄曲依然江左舊風流自喜漁樵得共遊
病社云岩廊詞客擅風流自喜漁樵得共遊
裏愁心遠授簡秋來詩思一登樓疎簾棐几
山當座楊柳芙蓉月滿洲伏想年來題咏處
家家珠斗夜光浮青溪對雨云長空飛急雨
虛閣對滄洲蕭索三秋盡微茫十里收絲飛
桃葉渡雲隱鳳皇樓坐領寒江趣烟簑起釣

園中柳云園柳吐春姿鬱鬱寒塘側
盈盈陌上條日日送離別玉筍掩深閨金鞍
遊上國韶光日以暮雕落良可惜攀條欲寄
之不語淚沾臆中情豈故殊何嗟失顏色離
別勿復道願言崇令德喜諸君分詠小園云
輞川賡和處裴迪有新詩豈意千年後風流
今在茲買山成小隱投轄得雄辭今夜青溪
上文光照水湄冬夜程孟孺莫雲卿姚光虞
過集云坐深銀箭燭花開荒逕能勞二仲來
書變鼎彞傳古法吟餘風雅盡詩才談生塵

尾將迴雪暖盎枝頭欲放梅更喜吾宗同笑
咏草堂今夕聚三台賦得白鷺洲送黃叅軍
奏績云岷山遠發大江流采石東連白鷺洲
一片蒹葭搖雪浪三山臺殿枕丹丘地邀綵
筆增新色人對離尊起別愁羨爾雲帆天路
近春風吹到鳳皇樓冶城餞吳莫莫魏張四才
子云冶麓高寒結駟來旗亭卮酒傍丹臺黃
金舊鑄雙龍劍白雪新傳四傑才天半月明
瑤鶴下林間星聚石壇開送君翻念青溪社
醉倚離筵不放杯

華明伯名復初無錫人父補菴先生雲為此
部郎博雅好古家藏書甚富明伯少有才名
光嗣其家學取藏書一一校讐之又喜為詩
與盛仲交相交善隆慶癸酉以貢授應天學
訓導仲交尚為弟子員雅相師友意各自得
也從所寓檮棗燭軒延客客至輒舉白賦詩
為樂軒中雨集得四言云有客容膝亦孔之
安載集佳賓佩玉珊珊佳賓至止德容几几
四座講德周道孔邇湛湛我池鑒爾令儀君
子攸萃燕笑孔宜洞酌我泉淪我山茗客醉

而歌亦既酩酊陽旣伏止澤藏乃宜迅雷風
烈慨焉非時賓旣醉矣雨亦滂矣夜如何其
夜未央矣雪中借馬云踏凍匪無東郭履沾
花空有杜陵詩錦韉不惜晚來借紫叱何妨
醉後騎自是看山揮策緩非因傍險得歸遲
長安陌上多游冶不似灞橋風雪時美人走
馬云艷質輕千里翩然自出群乍聞乘月駟
驚見逐飈輪飛韉嬌纔逞縈鞭捷有神霓裳
同蹀躞霞帶共繽紛來似花成陣迴看雪滿
身鬟拋驚欲墜襪蹻不生塵卻漾垂青組挑

飛蹙錦茵波涵秋欲轉峯歛翠猶顰猿挂玉
山夜珠浮洛浦津星流行更穩電掣態逾新
彷彿雲中見飄飄認未真市隱園冬日不殘
冬景倍暄歛似入冬候山家酒初熟鷗盟復
如舊水底見鍾峰窓間列遐岫何須絲竹響
但喜花木秀日暮繞池行清風滿懷袖鶺鴒羣
閣觀水邊芙蓉云昔曾咏秋水又見秋深時
芙蓉故遶徑菊英尚滿籬有花不來賞時過
緩惜之紛紛塵中人擾擾將何為徙倚不忍
別殷勤對玉卮今日良宴會云今日良宴會

射堂何鬱盤勝友畢來集寶樹棲鵝鸞揮筆
飛雲烟字字青琅玕人生貴適志知音良獨
難主賓旣款洽藹藹如金蘭聚散慨落葉誰
能念歲寒姚原白病後入社云芙蓉夢隔三
秋月黃菊歡同此夜尊幾度鳳皇臺上望閱
江樓畔荻花村送朱比部守重慶云巴江曲
曲萬載流提封百里古諸侯江流晝夜自不
息何人遺愛傳千秋曾聞宋季余安撫關館
招賢資幕府聚米為山衍陣圖二冉奇謀為
誰吐釣魚山下江之衝移堡依山設險重欬

寧州輯稱良牧至今猶羨中興功使君兇僣
重璠璣玉筍山中曾著書一麾出守青雲色
焚道新乘五馬車只今有道成沃壤桑土應
須計安攘巴渝千里起淳風重為余公拂遺
像明伯有三子皆才俱能詩

盛貢士金陵人名時泰字仲交少與兄時春
俱有聲庠校時春舉癸卯鄉試為冬官尚書
郎仲交獨三十年困場屋所居近洛城有蒼
潤軒貯法書名畫其中焚香煮茗客至留連
竟日又時從冶城登黃鶴樓從友人把酒賦

詩下筆數千言立就嘗以書千里致楊修撰
用修及文待詔徵仲相與為神交去城二十
里為攝山山之左有大城山仲交結精舍其
地時跨一青騾命小奚奴囊古琴隨往來嘯
咏甚適也無事夜篝燈讀書晨起斫薪為爨
因自稱大城山樵嘗曰孟堅當卯金末造猶
以兩都擅名太冲遭列國鼎分尚藉三都振
響今

聖明混一天地再闢列聖相承重光累洽文物
之盛亘古無前柰何使豎儒專美千載也因

為二都賦期上之歲癸酉以貢入為大學生
子敏耕有父風為詩亦多藻思紹其家學仲
交為社中詩援筆立就已輒失其稿其立春
後一日同莫雲卿蔡世卿訪朱比部用常左
司韻云梅花栢葉彩華新官舍蕭蕭竹樹隣
露塵經時虹氣健雲筒隔歲馬蹄頻久甘鴻
迹為樵客不愧鳩司作從臣最是江南明月
夜共將花柳詠初春送朱比部云幾年官寄
白雲司日日行吟湖水湄五馬西川勞作守
一尊南郭暫相持天邊雲樹依臺遠雪後春

濤出峽遲自昔蜀中多勝蹟品題應是待新
詩同費民益黃以藩葉茂長晚遊方山云千
山迴合日將曛一片鍾聲下白雲茅嶺葉飛
寒色早秦淮水落暮烟分風含石竇疑泉響
月朗岩扉過鹿羣却憶向時曾載酒桃花細
雨共氤氲曉登雞鳴山塔院望後湖殘雪云
夕陽歛湖光殘雪散山簾鍾聲飄寒空人家
隱深竹一鳥下高天迴翔向藂木老僧澹無
言相看幽意足黃以藩過訪云竹下論詩寒
色生蕭蕭僧舍夕陽明湖光若是山陰道雪

片應飛白下城酒盞暫依梅樹坐琴囊何惜
蘚痕行高天欲晚還留句何愧任翻半字情
寄陳仲魚云臺上重開碣石宮海鵬南徙越
長風青雲原是天邊客白馬羞為歷下雄溪
叟不妨漁艇在洞仙應許鶴書通海陽春色
知能早何處桃花開最紅同莫山人過市隱
園云向夕風吹池水平高天雲淨雨初晴朱
闌隔岸魚俱躍蒼玉當軒筍亂橫作客不堪
憑遠眺吟詩一為散閑情醉來坐愛松林好
共向涼臺待月生寄費叅軍云青溪流水繞

長堤別後懷人芳草萋同社不堪重載酒逢
人空憶舊留題宦情落莫悲蓬鬢世路參差
共馬蹄不信君才原出衆可容長日在途泥
和許太常秋日書懷云淮浦新潮映月流秣
陵曉色又驚秋庭除共喜生三樹鄰里何勞
羨五侯踈廣自知金玉賤山濤不為簡書留
年來贏得身強健却笑虞卿枉解愁池塘坐
見一螢流遂有梧桐為報秋拓境近知新拓
地醉鄉曾許舊封侯不妨出郭青藜伴最喜
尋僧白社留潘岳近來多閣筆悔將詞藻賦

閑愁

周山人才甫字文美永嘉人嘉靖中以詩鳴
所著有鴈川集隆慶辛未遊青溪社所為詩
具載社稿中家故貧客遊江湖以文酒自適
喜作梅每對客酒間命筆殊可人意又自為
詩其上詩才亦秀逸南都士大夫能詩者皆
樂與之遊余去金陵文美從方子及結社以
詩寄余渝州其同方計部集安茂卿寓閣云
層閣倚鍾山芳筵得勝攀乾坤容我醉日月
向誰閑粵客驚狂態吳歛索笑顏相忘軒冕

貴白眼浩歌還李比部方計部載酒齊王孫
園亭見訪云並馬名園裡携尊就隱淪已憐
金作谷况倚玉為人白髮狂何劇青山嬾是
真詞名歸二子誰不仰清塵新正六日同丁
周方三計部集王元德大夫宅云背郭堂初
敞開尊聚酒星歲新頭漸白人舊眼俱新山
水存高調風塵笑獨醒若非憐意氣何以慰
沉冥送王按察四川云憲府開西極分符重
地曹帆前春樹遠天上法星高旌旆懸三峽
圖形按六韜君才堪賦蜀萬象待揮毫迢迢

巴山路千盤鳥道懸馬前浮曉日雲裏響春
鵲交態慚余拙疎狂籍爾憐不能隨去旆飛
夢到西川雪中方子及席上閱康山人詩傾
尊飛雪滿江津披對瑤華憶故人身寄黃金
臺上月歌翻玉樹郢中春獨醒天地堪容傲
高卧烟霞不受塵客久星霜凋短髻何如回
首共垂綸

費左軍

民益

名

懋謙

少保費文通公子也家

世為鉛山人自文憲公以龍首當揆文通繼
起鉛山之費遂為西江甲族民益以貴公子

顧折節下帷讀古人書性又喜吟以陰入為
御史臺都事鄉人楊懋功祠部郢中陳玉叔
大理時俱以詩名燕山民益間就為社會已
為南左樞叅軍青溪之社民益實昔倡之又
從樞府第構籌筆軒客星槎淪茗焚香山人
墨客延接無虛日閩有王山人者善寫梅民
益即從作梅金陵陳子埜善墨竹民益即從
作墨竹晉江黃孔昭工山水民益即為山水
皆得其意嘗以十月邀余籌筆軒因命余記
其事任叅軍山甫繼至時庭菊盛開因共呼

酒飲花下各賦一詩達旦乃罷又招余避暑
天界時炎日方熾旦從城中來黃塵撲撲隨
馬足民益煮茗山中竹院共坐松窓下岸幘
撫几清言竟日薰風徐來拂衣袂飄飄然若
遊水精域中隨出酒對酌各賦詩二章去余
領渝州民益復招余籌筆長洲周秀才懋修
雅士也適同盛仲交來因共卽席賦詩贈余
周詩云五馬雙旌滿路輝卽官出剌兩川湄
才同何遜離京日望重文翁化蜀時閣道使
星臨錦里岷江卿月映峨眉詞情到處堪留

社樞管梅花遲所思民益云追隨白社六年
餘羨爾新詩獨起予遠指雙旌臨錦水先驅
五馬向匡廬江梅試暖離觴劇苑柳迎人執
袂初重握春風更何許涪江魚鴈莫教疎又
從江閣以停雲詩一冊訊余渝州民益詩云
玉麟西綰憶當年龍劍分携思黯然雲自褰
帷高北極春從露冕下東川花間曾醉新豐
酒江上猶歌郢雪篇聞道蠶叢多勝槩新詩
應向故人傳余自去渝州民益又掃舍館具
鉛槧延葉山人之芳論較文藝一日有鴈過

雲中影墮席上因觸興賦詩併所倡和為一
集氏之曰見鴈稿其為社中詩最多大畧具
前社稿續稿擬刻之渝州會民益以事謫稿
遂携歸玉山去不及錄民益好談詩客
屢怕滿戶外又喜從山人遊金陵諸勝蹟
足殆遍不知者謂兼於酒至或疑民益緣此
干與他有司然民益以貴介負奇氣所不足
非財也紈袴子目不識一丁字人多竊笑之
民益以彼其資好賢下士空空若不及此其
心顧欲從世俗較計蠻觸間哉嗟夫此可與

知者言顧在民益自信之耳

黃以藩者晉江人司寇葵菴黃公長子名喬

棟司寇子多賢而以藩次居長為博士弟子

有雋聲後乃以蔭補官南樞叅軍事時鄉人

黃孔昭亦遊白下以藩之館中與為詩山

人歸以藩為青溪社為會一日掃射堂延

議君子投壺博奕校射賦詩雅致因各

賦今日良讌會詩稍遲而黃先出為臨安守

文雅風流頗著冰檠聲會一官者與之忤遂

引疾去臺使者留之不得蓋不愧家聲云邀

遂閣喜諸君子入社云曾聞邀笛當年事何
意新聲此地逢多病一官惟闌寂浮生良悟
得從容尊開綠水心同遠坐對青山黛與濃
歡劇不知溪色暝城南烟寺起踈鍾窓中度
落葉云颯颯辭芳樹紛紛積素汀時因微吹
起却傍倚䟽經遊子愁方始佳人淚欲零無
勞翻舊曲閣夜雨冥冥青溪對雨云冬暖融
華雪冥濛作雨飛著蕉時滴滴沾幔更霏霏
有衍泉為酒何妨雲似衣青溪多勝事此會
近應稀今日良燕會云坐客莫辭歸聽我歌

一言今日良燕會翱翔集高賢大雅翕然作
希聲遠四筵黃鍾初欲動陽氣忽以還叩角
變清商金木互相宣豈無哀愁音不激亦不
咽浩蕩天地間風馬幾周旋此樂古未聞詠
言安可詮願攬羲和轡庶以永纏綿相逢行
別吳中四子云與君相逢處乃在青溪濱何
意溪頭柳能令傷客神與君相逢處乃在邀
笛閣何意笛中曲能令心不樂與君相逢處
乃在射堂上何意堂前月勞勞生夢想與君
相逢處乃在治城宮何意治中劍飛躍各西

東我昔承清貯君亦憐我姿願以朱絃報
君青銅枝終日不成縷對君空自持願以江
干淮報君蘭蕙芳終日不成朶對君空自將
願以青玉盃報君金琅玕終日不成琢對君
倚長歎願以錦繡段報君貂襜褕終日不成
章對君長煩紆贈君愛流畧我亦慎區區所
貴各努力聚散誰能無中情旣款款徙倚亦
何須古人皓首言君諒不我殊贈魏季朗云
季朗富文采人稱吳門魏觀其賦還鶴翩翩
凌雲氣漢落四十年卓爾下帷意蕭然緼袍

溫不求亦不忤豈不貴青紫所懷在尚志以
君皎皎姿何用不自致

任山甫字夢榛休寧人也而寓于杭初冒曹

氏姓後復姓任因自稱任公子歛有五安山

又自稱五安山人山甫於社中齡甚少然意

度才藻逾於老成初入金陵從惠山金山携

二泉至余候之山甫出虎丘茗瀹二泉試之

金山泉味頗重覺惠山稍勝昔人評中冷第

一恐非今水也余為賦四絕云山甫遊冶城

過盛仲交蒼潤軒有携雙鶴至者山甫納之

署中仲交與余為聘鶴賦一日鶴飛去半月

復還魏季朗張仲立又為賦還鶴山甫雅好

事為一冊屬縉紳歌咏之遂為白下勝事性

又好古篆籀所藏斯邈氏迹及古彝鼎款識

文甚富又能以古篆作私記文奇而刀法精

絕諸名家不及也出為興都叅軍以才著城

孝昌署當陽俱有成績當城孝昌時掘地若

干丈得一函遇風輒燼有古鼎出蟠腹參口

三足兩耳體被五色空青結綠中有識凡六

十字皆古頡籀文鼎出有紫雲蓋之二青鳥

回翔其上所置處有光屬天山甫以古篆識
之知為漢鼎王中丞元美博物君子也心善
之為作寶鼎銘碑其博古多識皆此類也然
居興都每快快不樂在當陽觀玉泉山鶴有
感賦詩云豈戀乘軒寵深懷別主情雲泥一
相失難驚不堪爭乍夢傳書舞時聞振錫鳴
試令生八翼可但迈遼城時民益量移德安
邂逅武陵因各賦詩數章民益云武陵川上
路旅館忽逢君白下三秋夢滇南萬里雲朔
鴻來浦淑霜葉映寒曛祇恐明朝別相期坐

夜分山南云我昔出白門黯然欲銷魂
隔楚水脉脉不得言我今辭異域夜夜聽啼
猿迢迢萬里餘相思無晨昏因君能縮地忽
漫逢仙源一為具鷄黍所欽古道存伊人洵
芳潔佩服蘭與蓀孰知匣中刀不別讐與恩
世路良悠悠謹后勿復論雨中同民益話舊
云江城樓閣暮雲低遷客登臨手重携楚國
大風仍颯颯秦時芳草已萋萋停盃似索黃
花笑擊節還驚白鳥啼當日誤傳流水曲妬
人春色是青溪民益和云白門送爾思依依

田皆風塵事已非郢曲陽春知寡和吳鉤寒
色看雄飛孤亭載酒江城晚一榻談天夜雨
微意氣如君後能幾肯令琴劍滯征騑與山
甫登武陵驛樓云高樓時騁望樓下武陵溪
細雨山容失繁霜草色萋帆流江漢遠杯逐
野雲低何處尋幽境仙源路不迷山甫和云
擁傳楚江隈登樓作賦才城頭飛雨暗殿角
曉鍾催客路仙源杳漁舟極浦迴馮蘭話羈
思芳信託寒梅送民益轉運浙東云臨岐日
未曉落葉感離羣望越山猶隔浮湘路又分

關門多此氣袍裡滿香雲倘到蘭亭下風流
見右軍民益送山甫老貢使入燕云使節度
遙岑迢迢歲月深豪吟多白雪入貢有黃金
滇水春風遠燕關劍氣深蒼生思舊澤莫動
故園心卧病懷歸云伏枕仍羈思那堪夜雨
聲天涯琴鶴侶歲晏薜蘿情家遠書難到余
寒夢不成何時理舟楫望入豫章城孤劍停
山館秋深此一過愁隨羈旅盡淚向逐臣多
渺渺鄉園路悠悠漢水波倚閭人望久惆悵
白雲阿山甫和云楚客原同病羈人共漢津

孤鏐縣兩雪雙劍老風塵既與朋儕好還憐
骨肉親寒宵不能寐相對淚沾巾萬里事行
役經年往復還多愁生白髮一病改朱顏不
厭沽新釀長思逐舊山
同若嘆留滯窓外雨
潺潺噫二子之志見矣
山甫社中詩携去興
都僅記雪中借馬云
裘馬千金輕借客少年
倚馬復裁詩卽尋常
同題
去夏向看花陌
上騎桃葉雲寒垂
曉曉風急促鞭遲天
閑此日多神駿曾
是謔君得意時送朱比部
云使君五馬向西川
千樹桃花悵別筵飛
燕

卽隨梁月遠愁心還共署雲懸卽杯白眼知
何日染翰青蓮亦有年書記本來耽著述因
將高倡郢中傳山甫後遷雲南倅余入汴復
握手西陵一日去天涯知舊忽漫相逢蓋不
勝慨矣

唐大學資賢號鳳臺胡計部世祥號曙峰鍾

叅軍倬號玉陽俱粵人大學子為南吏部郎

然以好吟時野服從山人遊味有許丞之疾
而談吐洪亮性頽悟不羣雖以貢入大學非
其好也計部性介直不苟合在曹中閉門賦

詩鮮與人接稍得簡倨聲卒以此去叅軍蹇
諤有父風在隆慶初欲抗章論列時事為知
交所阻不果上竟託疾歸入社未久詩皆具
前社稿中

莫廷韓初名是龍字雲卿後以字行華亭人

以貢入北大學父中江先生嘉隆間以詩名
為廣西藩伯廷韓尤有雋才書畫琴奕投壺
射藝歌曲戲劇無不精絕癸酉以諸生應督
學召校書南都時與吳瑞穀魏季朗張仲立
邵長孺從青溪社中為詩會社有邀遂閣乃

陳大令所構初入社諸君各分韻賦詩廷韓
得孤字云小閣邀懽興不孤錦屏華燭照清
妍漫投白社携詩草共許青山卧酒壚風笛
蕭蕭催落木烟楞漠漠暗平蕪倦遊廿載無
知已拂拭今將慰旅途是日雪余以馬載長
孺還長孺會中作雪中借馬詩華明伯因舉
美人走馬詩有云似驕還似怯憐駿復憐神
廷韓因令和長孺詩而又以美人二句令各
成一詩詩成乃罷次日復集賦青溪對雨及
窓中度落葉詩次集姚原白市隱園共賦鬱

鬱園中柳及分賦鶴逕鷗波秋影亭鷺群閣
秋水諸詩次集陳子楚環碧樓共賦相逢行
及環碧樓嬾真山房詩次集射堂賦今日良
宴會次集高座寺雨花臺賦雨花臺城南晚
眺諸詩次集朝天宮白鶴樓賦塞下曲次集
晉德寺各為別詩而罷廷韓既以貢入大學
又從都下遊一時名動公卿間乃走書約余
丁丑為十日飲已下第歸余乃入都門不及
晤蓋矯矯雲間之龍也雪中借馬云蹠躓爭
憐駿骨奇灞橋衝雪漫裁詩還將范叔綈袍

意分得卽官廐馬騎色借五花驄影亂寒搖
匹練客心遲莫言東郭先生賤不是長安曳
履時美人走馬云何處青樓俠來馳紫陌塵
似驕仍似怯憐駿復憐神顧影妝全墮停鞭
態轉新稍遲應索伴每避為逢人結就花為
陣翻來燕是身飛揚雲外色撩亂苑邊春夾
道風流眼爭看恐未真窓中度落葉云綺疏
臨野渡秋樹響前林颼颼含風入紛紛逗雨
深拂來紅袖掩積處綠塵侵誰送哀蟬曲無
端攪客心獨樹蕭蕭下邊淮正可憐悞投齋

閣裡不似御溝前
洒戶驚秋夢翻經
助夜禪
江潭悽惻處但莫
問長年鬱鬱園中
柳云聊
暇陟中園差可遊
余矚當春赴和節
簷柳報
新綠繁陰憑林起
浩霧澄空沐曖曖
清池幽
冉冉平臺曲玲瓏
起朱扇阿那迴丹
轂移根
建章道拂絮雲陽
谷宛彼黃鳥言流
音戾華
屋華屋栖佳人欣
至歎別促况乃及
衰暮怒
焉感情育鶴逕云
一逕掩山扉蒼雲
墮烏衣
欲巢珠樹偏開點
翠苔稀霧薄秋陰
淨霜空
夜色微共憐霄漢
意猶此傍人飛嬾
真山房

云嬾慢非緣傲天真亦自宜青山歌枕慣白
日放關遲坐有烟霞色人疑土木姿從來拙
叔夜禮法未能羈相逢行云吾黨本貧東西
人闊絕萬里岐形神忽然邂逅漫相值憊氣
乃若平生親我時落魄長安道貂裘無色蘇
卿老白眼茫茫視何物先生歸乎苦不早長
安自昔稱豪華結駟擁蓋為高奢羈縻何心
謝聲勢不才差可沉泥沙鄉歌無端涕橫下
調將彌高和彌寡偶因世道值熙明耿耿心
期共風雅石頭城邊霜氣寒挑葉渡口淮河

乾窈窕長堤啓朱閣紛紜五色披琅玕余乃
東吳漫遊客誰其傾心借溫澤昔聳先達耻
彈冠今有諸君下逢掖世態悠悠難可論素
交寂寞無雷陳烈士由來重然諾片語相復
輕千鈞君不見侯生睥睨待公子北面刎頸
斯何人又不見荆卿感恩易水上持利匕首
西入秦丈夫突兀固如此安能俛首溝中死
雄飛雌伏命所使諸君麒麟我鹿豕萬事咋
舌我不鳴爾時但唱相逢行狂來呌笑一起
舞芙蓉夜吼珊瑚驚才俊縱橫坐夜發三峽

詞源流不歇飛霞片片儘可餐瑶草校詩書
堪擷潤色真成昭代觀風流已駕前朝轍海
內文章稱阿誰吾黨屈起何矜奇俯仰一世
未肯下得失千載誰當知嗟嗟空名稍可緩
河清難期髮白短只今且盡壚前歡歸去山
中雪應滿塞下曲用高常侍韻云孤戍十年
心材實舊羽林愁迷青塞閣夢遶玉闥深匣
劍韜雄氣邊笳和朔音陰山無過鴈一字抵
南金立春日晉德寺留別云山寺一尊酒其
如欲別何交逢青眼舊坐入翠微多芳草春

邊路雲帆天際波從今遠公家寥落幾人過
立春後一日與盛仲交蔡世明同過朱比部
用常左司韻云帝里風光入夏新天涯時喜
得比鄰似憐舊命才情減可奈浮生歲序頻
南郭栖遲歸大隱西曹題對舊詞臣長安裘
馬凋行色又見鶯花及早春餘不能悉載
魏季朗名學禮長洲人以貢入大學初與劉
侍御子威遊結社相倡和有比玉集後又與
黃大學孔章遊刻采蓉辭崑山連璧蘭澤同
心王中丞謂滔滔洪藻名下固無虛士矣

溪癸酉之會李朗作下第入邀笛閣社詩云

漂泊猶存原憲風不將名墮五陵中梅花吹

落思桓子蓮社邀來異遠公古渡霜寒流水

在石城秋豈暮烟空蕭條莫問招賢事四首

荆山泣未窮

閣在棘院前故云

又邀笛閣云王令風

流尚可攀何人清弄水雲間月明朱雀音疑

吐擗落長干人未還憑檻戍懷生折柳倚床

別思在關山桓生千載知公等暮雨蒼茫苦

竹間雪中借馬云衝冷漫成髀裡嘆據鞍仍

奉郢中詩寒生梁苑憑誰賦名傍燕臺借爾

騎數里豈煩千里捷五花應為六花遲黃金
結束曾無惜尤勝昭王下士時鬱鬱園中柳
云園柳何芳菲垂條蔭修陌朝華露未晞春
陽益鮮澤攀條寄所思所思在遠道別離傷
春心歲月忽已老河漢多秋蘭原上多芳草
故園日蕭條歡會苦不早思君不能寐顏色
凋美好塞下雲云寒風驚客心飛雪滿長林
漢月臨關無語沙磧寒深紅鴻辭戍角邊馬
識笳音但使匈奴滅無勞撻賜金別來比部
云曉霜鍾鼓動嚴城秋署為郎薄送迎

北看雙劍在大江西掛片虹明梁園後至能
傾坐燕市高歌不為名綠綺欲須鍾子聽夜
來空作別離聲余丁丑入覲季朗寓王宮詹
館中為余評郁木稿余西還贈詩云巴江劍
閣似秦關計吏初辭玉殿班腰下雙龍看紫
氣斗邊五馬度青山盤叢舊國徵茫外鳥道
丹梯杳靄間賦就新詩堪照來漫誇合浦夜
珠還後授某學博士去

吳瑞穀字子玉

新安人博學尤工古文詞有

吳子玉

集四冊詩亦典實然構思良苦其入

社詩云銀燭金盃向夜清初冬風日似春城
帝鄉古渡粉榆社官舍新驩薜荔情遂弄潛
漪雲外度劍開繡澁斗邊明遨遊上國延州
事欲聽蕭韶入座音雪中借馬云白下久聞
歌白雪不妨雪裡過論詩雲司肯借三花駿
柳外還教十里騎剪拂憐才心獨許驕嘶嘶
意步應遲馮驩不用悲長鈇青眼孫陽一顧
時美人走馬云遊睇過金埒方瞳起紫塵迴
花雙弄影入柳一傷神試體疑矜寵嘶馳欲
帶輦裾翻纓絡急裾閃障泥新輕似臨風迅

驕還顧步頻金羈。挫釧穩朱汗透蘭紉。飄去
香垂手散來雲滿身。未須看步襪陌上遍生
塵。窓中度落葉云綺疏。秋色暮萬壑樹悲鳴。
飄戶風將入穿櫺。雨送聲乍飛寒鳥亂遙度。
片雲輕不次題詩句。那堪寄遠情。市隱園海
月樓云。夫人貪得月海上。結樓居素暈浮仙
島。金波湛綺疏。光生滄渤裡。氣溢影娥餘。更
有明珠在清輝。夜自如相逢行云。廿載冥心
汗漫遊。一望暝色迷滄洲。歸壚直探鷺陽侯。
風雨黑夜生窮愁。持向人間何所投。清輝夜

夜照培塿崇臺聚處已成丘幾回滇散無人
收我心自咤還自休鏡中白髮詎寧羞北望
長天慘敝裘人前不慣歌荊綬青溪勝地標
風流相逢一笑大白浮飛辭純藻期千秋論
交一片心綢繆惜無厚風借前籌開懷已許
青雙眸咨嗟漫嘆千古上且盡尊前瓦甕甌
嬾真山房云陶令真成嬾悠然三逕餘意隨
簷鳥倦心共慢雲舒棐几惟玄草匡牀有逸
書勞勞亭上客那似卧精廬贈比部朱大夫
云公車待問蜚名早載筆一心雄妙藻氣橫

勸漣邁千穉豪動

帝王容草草一時會集俱時名大夫緩頰四座
傾俠思如山能借客貞心如水肯逢迎清時
稱幸爰書少蘊籍為郎窮浩渺厚力馮陵萬
里遊詞華交映五雲曉東南有美豫章材孤
高百仞何崔嵬一柱天摩楨秘閣森羅地軸
起蘭臺大國之風漢魏上直數百代神猶王
黃序階前畫象流白雲司裏雕龍蕩南都文
采高燭天戛玉猷金誰是先勸君漫把誇時
輩與君相須萬古前城南晚眺云迤照駐南

樓耽奇郭外遊烟光團帝里雲物靜仙立二
水清逾落千山翠欲流低回難便去晚色繁
人幽留別青溪諸丈云聚雲疎木澹離筵樓
角三聲鴈去邊歸客風塵看短劍思君雲際
誦瑤篇驅轅獨出長千里聽曲渾依古渡前
勝地從來悲去住青溪壁月幾回圓瑞穀於
文極意憲古故於時義少遠將入貢京師值
督學使者至考列四等戊寅以書訊余并述
坎壈之態為咨嗟久之然以瑞穀之上追
左馬間區區一青衫奚足置牙頰為也

張仲立石文柱崑山人年最少家貧從其父

遊業金陵後歸補邑博士弟子員已未

公復俊甚器重之窶居一室痛曰緣誕館讀

書賦詩意澹如也詩清新俊逸然以窮愁故

多羈栖咨歎之語其邀笛閣入仕云聯翩飛

蓋鄴中聞亦許裘衣一席分白社有情邀弄

遂青山無恙記移文浮盃暝墮兼淮葉下榻

寒生楚澤雲久客不須愁歲暮陽春曲裏正

氛氲雪中借馬云不是即官裘馬意高人那

得慰尋詩暫逢鄭客橋邊思轉憶山翁醉後

騎曳屨已無行雪恨穿林猶爲青山遲五陵
年少如相問可以驕嘶十里晴寒中度落葉
公裊裊回風下蕭蕭薄歲陰一山方隱几片
雨自萌林重以經霜色凄其入曲心高居尚
搖落不敢更登臨青溪對雨云十日卧長安
何人晨飯看尊前今雨合句裏客星寒故國
關河阻他山烟霧寬欲從荷葉者隨地著漁
竿市隱園鷗流云聞道五橋莊中連谷水陽
主人滄海意都與白鷗忘沙合寒烟積磯深
夜雨張江頭風浪惡常得聚迴塘薜薜園中

柳云昔聞隋河柳搖颺千里堤至今名園內
常與東風期陰陰羅曲坼靄靄蔽芳池靜倚
高樓望但見青垂絲無烟亦慘澹無雨亦離
披啼鶯出其中聲聲動柔思我欲一折之恐
使行人知行人會有適春華難及時環碧樓
云不淺元龍卧翛然百尺餘神猶棲澗壑目
已到清虛猿鶴中林近烟霞四戶舒自成招
隱賦真笑買山居相逢行云聽我相逢行悠
然天宇孤且攬鐵如意起擊君唾壺君不見
人世飄飄多客卿我來騎馬長干城秋風落

落今如此惟下青雲心欲死有賦難令天子
知有名不入時人耳手提蒯緱劍自歌行路
難一歌白日沒再歌夜漫漫偶然聲繞梁直
動諸君嘆諸君往往大夫才更到憑高意氣
哉腰間三尺綬為我俱徘徊徘徊荆生市爛
熲阮公厨不奏高卿筑不彈隋侯珠出門大
道風塵黑轉向風塵見狂客或時執轡侯仆
車或時曳履迎逢披向來臨岐淚對君頻拭
之滄江碧海揮無際望入浮雲杳杳馳浮雲
馳處空山暮言問山前邀笛步隊隊征鴻斷

故城紛紛隕葉迷荒渡隕葉征鴻數慘然鳳
皇臺畔起寒烟昔人遺曲今人和莫道相逢
不可憐聽我相逢行視君眉宇都我有逸思
凌飛鳧諸君况是翩翩者金蘭之契古所無
為君高叫揮桑榆好手遭時亦易耳百年鼎
鼎何為乎今日荷君裾他日夢君地聚散由
來萍梗輕行藏稍涉英雄事諸君一一廟堂
身我亦甘心白壁珍門前長揖彭城相別後
相逢是故人塞下曲云有鴈逐歸心無書逐
上林天山陰不斷秋至雪花深白草分秦甸

清笳雜漢音將軍橫戟馬價是一千金城南
晚眺云郭外千山傍夕看稍凌高處覺衣寒
林疎寺靜將歸鳥日落江深更急瀾舊國淒
迷芳草遠佳人迢迢碧雲殘烟中忽辨孤帆
色悔不從風寄羽翰黃鵠篇酬朱比部云黃
鵠有脩翼汗漫青雲期一飛薄九州一息崑
崙池鷦鷯周十仞恒苦渴與饑幸蒙嘯拂意
因風覲光儀天路不可致蹢躅從此辭朝覽
城闕間暮愁白日移依依玉林露無由寄南
枝賢貴而愚賤造物固如斯惟當戀明德感

激以心悲留別杜中諸子云浪迹頻年類鳥
居羣公相繼枉籃輿馬卿病徹遊梁後燕鳥
聲殘失越餘去國浮雲常黯黯還家寒樹半
扶疎長安米價今猶貴更復何門可曳裾仲
立去金陵携黃孔昭詩序而刻之吳中嗟夫
世未嘗無知音仲立子虛之賦必有因狗監
而得者豈終於不遇也

邵長孺

名正

魁

休寧人父蚤卒母夫人矢志

鞠之成長乃肆力於古文辭為續劉更生列
女傳嘗遊梁客燕已又從燕客金陵入青溪

社一日訪余官舍會兩雪余遣騎送之因就
社中作雪中借馬詩遂為一時佳倡詩云東
郭先生淹待詔西曹才子久稱詩人憐玉樹
朝相過馬借銀鞍雪與騎控縱自防身覺穩
迷漫那得路嫌遲青雲先達容徐步却忘京
華歲暮時美人走馬云紅妝輕結束紫陌騁
芳春色借桃花暈啼翻白雪新似驕還似怯
憐駿復憐神挽有金為勒行知玉是塵過都
應絕足傾國復何人一顧同千里雙飛并此
身逢歡楊柳陌流盼見情親窓中度落葉云

秋思動蕭蕭前林送寂寥隨風催入戶帶露
乍辭條妾命應同薄如踪豈共飄青年能再
不覓為可憐銷青溪對雨云未了看山興重
登溪上臺好風迎客至今雨為誰來賦擬攀
青桂行知破翠苔為霖時已暮相對且啣杯
贈陳子楚明府云二十年來傲吏身陰成五
柳傍溪濱還將舊日鳴琴意邀取風前弄篴
聲名士悅傾城云月照流黃滿情將芍藥深
豈緣矜國色應為得琴心比翼看雙舞和鳴
識好音青春願長在莫遣歲華侵留別社中

諸子云策馬燕關雲一駐金陵雨金陵城南
樂事多前輩風流尚堪數誰家高閣青溪邊
集中冠蓋皆時賢閣上署書邀笛字令我恍
忽懷當年我曹意氣要自足相逢何必論因
緣翩翩入座忘賓主大呼岬憤羣公前青溪
主人陳子塾解官久作忘機者掃地焚香自
晏如客來不厭同瀟洒何知俊逸才莫當叅
軍近得費與黃朱君長者能任俠起家況是
尚書郎句吳文學華公子談經亦有詩名起
盛先袖出兩京賦要與三都角長技吳季揮

毫先刻燭魏朗同工翻異曲莫卿蚤發雲間
龍張卽神采崑山玉姚翁久宦稱客卿一時
通刺多豪英清狂復見任光祿踈曠何如阮
步兵羣公豈是平生好以我片言盡傾倒酌
酒為歡重布衣結交卽晚知名早薜蘿情同
落地親男兒四海自比隣今宵興盡且歸去
明日重逢是故人長孺有梁園燕臺詩黎秘
書惟敬序而刻之丁丑余入覲長孺入為大
學生寓歐博士楨伯繡佛齋相見懽甚余別
復贈以詩云郡侯不與省卽同倒屣猶存下

士風詩自中和稱益部社曾淪落問吳宮時
名海內千金重世事尊前一笑空霄漢憐才
公等在豈堪結侶五湖東

方子及名沆莆田人舉戊辰進士為全州守
入為南戶部郎中為文倣司馬史記詩非大
曆貞元以上語不道也當子及入為郎也余
適出守渝子及以詩送余云君去停驂涪水
源回瞻清署白雲繁山川舊紀蚕叢俗郡國
新推五馬尊巴徼鶯啼詞客興嘉陵春遠大
夫軒懸知治行兼經術報政先涪漢主是余

去後子及乃入社中又以詩訊余云別離猶
憶帝城東西去巴山指顧中消息三秋踈鴈
字幃帷萬里入蚕叢政成堪下黃金詔賦就
還傳白雲工知爾高齋時北望五陵佳氣鬱
葱葱其市隱園橋成云臨流重結構夾岸往
來通小艇迷花下長虹落鏡中客從蘿逕入
檻倚水亭空興洽思題柱高軒日過逢同社
中七君子治城納涼云高閣憑陵野望寬翩
翩賦客共登壇百年逸興還河朔七子才名
自建安牛渚風生櫓影動龍山翠落酒杯寒

悠然鍾磬江城暮不盡狂歌更倚闌聽竹云
淇園似在石頭城半畝琅玕拂檻清傲吏未
忘麋鹿伴空林忽作鳳皇鳴聽來風雨千山
暮賦就瀟湘萬里情自是王猷多逸興還期
尊酒坐深更白鶴樓曉望云紫殿蒿呼曉伏
收聯鑣猶喜訪丹丘樓開白鶴來真氣山對
青龍擁上游曙色忽從雙闕散浮雲不盡大
江流佳晨誰負登臨興潦倒琴尊樂未休雪
後送康山人兼懷元甫本寧云白下初聞碣
石談何來朔雪動征驂五陵俠客皆虛左一

詞林見指南去路丹楓江上盡思家芳草
夢中含燕臺自昔多同調矯首龍門意不堪
社中諸子夜集寓館余以事後至云結駟從
容訪草堂自公忽設倒衣裳到門有客題凡
鳥貫酒從人典鷄鶩夜靜不妨清漏徹雪殘
猶傍綵毫光怪來百里星方聚稍似風流汝
潁傍兩夜同丁庸齊集周璫方蔡諸子飲奕
云結客張春宴酣歌此夜偏已擠清中聖轉
覺奕猶賢兩急長江外寒深短燭前不緣投
轄興爾輩好誰憐一局消幽事清齋夜色虛

如渥行臘酒帶雨摘春蔬上客歌魚少浮生
夢鹿餘當時稽阮輩軒冕意何如開歲二日
文美仲玉子虛過飲云椒花兩日媚佳辰詞
客招携漢苑春頌酒風流諸子在談天意氣
一時新已知湖海狂相傍更覺文章老自神
典盡鸛鷖堪共醉清時那數獨醒人姚典客
陳明府姚太守安秀才陳吳周璩四山人小
集寓館云獨守玄經心事遠何來車馬款柴
扉懷中白壁俱明月江上春星半少微斗酒
不辭今夜醉庭花猶覺冒寒稀早知詞賦追

梁苑彩筆憑陵四座輝子及為郎以公居
為同舍所訐事甫白又坐領勅事就逮降二
秩去子及去而青溪之社於是廢矣

金山人在衡名鸞隴西人從其父宦金陵因
占籍為金陵人在衡初為諸生才名籍籍後
刻意為詩及樂府諸詞曲一時名輩咸服其
工所著有徙倚軒集蕭葵齋詞稿嘗取古詞
辯其字句清濁為一書王中丞元美何翰目
元朗亟稱之山人年八十二目猶作細書余
領渝州山人贈之詩云萬里橋邊憶舊遊野

雲江樹接天浮懸知別路初經暑只恐歸鴻
已報秋涪水東來是無閣岷山西望達夔州
武侯相業文翁化千古巴人頌未休又云遙
憶清谿社於今又五年放歌明月底長醉落
花前山氣平分楚江雲半入川不知垂老日
鴈足幾回傳夕林初霽後春服既成時桃李
含情久瓊瑤報德遲青尊憐遠別白首幸深
知明月梅花夢相思未有期又寄余云清世
文章早見知湖山蹤跡各天涯荒蕪馬色勞
延佇細雨蘋香入夢思江館正逢新釀酒僧

堂猶寄舊題詩邇來料得文翁教歷徧春風
又幾時

張大學獻翼字幼于長洲人父雲槎翁倜儻
好義有俠士風喜延接海內士家有園亭水
竹之勝吳故多才幼于從伯鳳翼季燕翼業
其中而與騷人墨客相過從為樂以是名益
籍籍縉紳間文內翰徵仲尤相知忘年既乃
以貲入為大學上舍王公貴人爭折節願與
交卽司成亦禮重之不第子蓄之也伯季旣
領鄉薦幼于獨困場屋二十年然海內士皆

知幼于聲顧出二昆上隆慶己巳來白下余
乃得從之遊見百一詩及平生所著述因握
手為暱交幼于於人情最親其所知厚不啻
出肝肺示之今所刻秣陵遊稿中贈余詩最
多詩清新雅麗類其為人在吳中與皇甫司
勲子循黃山人淳父輩結吟社而遠招余金
陵余領渝州嘗數千里緘書來訊溫然厚德
君子也近著易說尤為時所稱云有寄吳明
卿太守詩云曾於白雪見文章不為青山憶
武昌藝苑才名多七子宦途心事半三湘人

前落筆誇鸚鵡郡內褰帷下鳳皇見說漢庭
思校獵未容長孺薄淮陽今國雅所選幼于
詩六首詩剛選三首然管班鼎鬻佳者尚未
盡也王中丞云幼于朗朗警思伯起正自斐
然伯起鳳翼字有志園集

黃山人孔昭名克晦晉安人善山水尤工詩
其為詩意常獨造一以古人為宗而不蹈襲
其語初從晉安泛彭蠡遊匡廬渡九江登武
昌黃鶴樓吟眺久之乃來金陵在匡廬贈僧
有道高第子堪傳少行苦鄰僧共住難之句

盛仲交亟稱之然孔昭遊楚詩佳者固自多也其來金陵客黃以藩館中每從以藩遊金陵諸勝遊輒賦詩以藩輒收而錄之成帙莫廷韓張仲立初未與孔昭接見其詩愛之携歸吳中仲立序而刻焉命曰金陵遊稿自金陵歸又從晉安遊金臺客俞將軍館余以丁丑入計因從孔昭遊西山孔昭意所至援筆卽景且遊且咏得詩若干李于美為刻西山倡和編已又從金臺入維揚所遊金臺詩林登卿太守刻之通州孔昭有泉石之好不輕

與達人遊而識與不識皆願與孔昭接與人
交默默若無所管者一發之深沉之思而奇
句逸韻見者動色信隱淪之高致文苑之端
人也其贈余金臺云畫軾鞦韆至青春古北
平別來雙白眼相見幾同聲意氣尊前諾循
良闕下名文離君莫問天地且吾生君入渝
州後新詩句句傳孤雲飛楚峽明月出巴川
春暖談交處風生說劍前請看河上柳開葉
為誰憐自芋源發舟至劍津云畫船蕭彭霧
中開一日上灘幾百迴野樹自花還自落水

禽雙去忽雙來金沙月亂星星影錦石濤翻
冉冉苔五岳從今遊跡徧不因溪險且徘徊
暮遊武夷至四曲歸宿萬年宮云千峰暝合
水生輝玉女潭邊返棹歸拂逕藤蘿春自引
傍簷猿鶴夜相依來時髮白從教變夢覺身
輕只欲飛大隱云云此三篇為余種樹待成
園病中風雨寄歐楨伯云蘓門衰病颯驚秋
風雨蕭蕭獨倚樓四海新知名下老頻年多
病客中愁雲連北極迷宮樹水發西湖出御
溝京國逢君歡不淺可憐經月不同遊送額

範卿馬上值雨云天涯雙鬢易成絲何處
涼不淚垂花下一尊相送後雨中匹馬獨歸
時逐臣離恨迷芳草滯客愁心掛柳枝明發
西山風日好還房裡榻與誰期立馬古城下
云立馬古城下日暮沙塵昏齊國多義士出
自田橫門田橫耻爲虜不屈萬乘尊二客甘
自殉感激爲乾坤如何五百人殞首無復存
寥寥海島中烈烈千古魂漢室諸侯王誰非
國士恩殲乃起相向俎醢何足論歐桎伯博
士邀集繡佛齋時魏季朗郭建初程無過存

上人同集得家字云四門已下先生榻雙樹
因過大士家床上海詩書連釋部折間袍帶雜
袈裟踈簾映日垂垂白絳帳牽風故故斜古
調自應傾海內同聲况復滿天涯冰河赤鯉
堆霜膾火圖黃蔬煑綠茅社友舊曾期惠遠
門生今更識侯芭酒中為壽身先起醉後留
權輿却賒落日龍鍾扶上馬寒天蕭索數歸
鴉陰沉九陌雲如墨颯沓千林雪欲花為問
何時還此集吟鞭早拂五城霞

梅禹金名鼎祚一字彥

八父叅知公

宛溪先生名守德以直節聞二伯氏才而蚤
卒禹金年尚幼叅知公尤愛憐之禹金少工
舉子業後稍厭棄之而工爲古文辭時王山
人寅陳山人鶴俱後叅知公遊最久禹金因
友二山人又最暱沈大史君典余在白下禹
金來訪已別去癸酉復來已下第去然數以
詩往來問訊不輟余守渝禹金獨送數千里
來訊其白下寄余詩云雄才元自豫章聞列
署風流盡屬君珠自驪龍干北斗錦從蜚鳥
破南雲天低二水回青影日落諸陵散紫氛

即有金莖慰消渴。漢庭今重子虛文。延眺高
林宿雨開輝。初日照樓臺。千峰寒影雲邊落。
百道泉聲樹杪來。紫氣中原遙入望。鴻書南
國若為裁。翩然一嘯真何意。江漢風情濁酒
杯。斟酒酣歌倒著冠。中宵星斗共憑闌。三山
只隔雙溪水。不盡寒雲醉裡看。別來事、轉
堪憐。風葉霜花媚晚天。不似白雲西署裡。長
隨僊客馬蹄旋。僊才吏隱大江濱。譚劍飛觴
坐夕曛。却羨黃金能結客。因逢白雪倍思君。
梅意冲寒慚向榮。何郎名振鳳皇城。愁邊側

望城爲藻夢裡頻疑度傷羣渝州詩云巴江
楊柳幾回新憶爾行春五馬停舊日諸郎推
翹草同遊詞客感飄萍漢家良牧南陽頌蜀
道雄文劍閣銘西望迢、無一舍暮蟬棲斷
不堪聽隔年萬里一書還當代才人岳牧間
矯首青雲縣蜀道銷魂夜雨夢巴山星疎朋
舊驚華髮歲暮空山戀苦顏始殺渝江、上
月凭君熊軾入燕關故人五馬在遠道一鴻
稀巫峽秋偏壯蛾眉月自輝丘中從偃蹇韞
上憶翻飛不敢操流水知音有是非余入汴

禹金又訊余詩云獲鯉巴江一札傳西風落
木又經年逢人馬首中原入憶爾嵩山盡戟
前十年開府未為遲回首青溪結社時玉樹
歌聲俱散盡桓家一笛向君吹一片飛雲入
大梁黃河北望正茫茫、後知幕府多詞客日
向平臺醉幾場虛左當年意氣真信陵千載
尚如新抱關小吏勞君問亦有夷門任俠人
禹金之於交道厚矣禹金詩甚富有遊白鹿
詩黃白遊稿已刻之宛陵其所自校而未刻
者余為之叙

黃進士雲龍王山人寅俱歙人夏山人曰湖
錢唐人莫山人公遠吳人紀亳州振東程秀
才應魁玉山人陳將軍經翰南海人俱先後
來白下相倡和黃有社稿其人深沉多苦思
說書自出意見與朱說稍異同然精者獨窺
理奧非漫語也文宗六朝詩亦有致第甲戌
進士卒夏詩已刻之社中王久有詩名有仲
房集其人卓犖不群書法亦佳甚嘗從塞上
遊還至白下余贈之葛山人以詩謝有云秋
來定擬攀鄣岳老去還從善寶刀殊有俠氣

莫詩往往有奇語紀初宦粵中從吳按察明卿遊又從五羊諸騷人作社會最後遷亳州判詩刻甚富以母老歸玉山嘗欲取交遊詩從郢中陳叅伯玉叔江都陸山人無從選而刻之會去不果程善顏書詩亦清雅有客越稿陳少有才名晚乃棄儒服從塞上遊余官金陵為叙陳山人稿後從都下晤之逆旅則已鳴劍揮霍馳志伊吾非復舊日陳生矣嘗以詩訊余渝州云巴江西望賦停雲五馬音徽久不聞彈鋏人前猶滯遠折梅天畔益思

君風塵自厭遊燕日富麗誰雄喻蜀文尚憶
秦淮為別意至今淒斷鴈鴻羣大守聲華北
斗懸才情原是藝林賢鶯花郡閣晴相媚書
劍天涯秋可憐客計吾惟餘短髮遊囊人自
重名篇半生漂泊思投筆莫望青雲一札傳
汪仲淹名道貫仲嘉名道會歙司馬汪公伯
玉弟也族叔子建名顯節吳人與邑文學程
子虛謝少庶結豐干社山中癸酉來白下費
民益任山甫同余置酒莫愁湖招之仲淹俱
來而程以事不至時宣城沈君典亦遊白下

仲嘉曰有一客在但不速卽來速之卽不來
矣已君典至大笑劇飲各卽席賦莫愁湖詩
明日子虛亦以詩來遂成勝集仲淹下第歸
數以書相聞甲戌四月從子建北上道中以
書訊余渝州并城所為詩相示仲淹下第云
得路難如此飄零似去年曉風城上月秋水
鏡中天咄咄悲生事勞勞問酒錢啼猿與征
鴈總使淚潛然有弟猶分散無天不可呼斷
鴻依落日匹馬泥長途一為芳顏誤俱令綠
鬢徂平生肝膽在終不落江湖得家兄書有

感示弟仲嘉云滄洲何事共微名落鳬空懸
萬古情一鴈天南悲自語雙龍匣底為誰鳴
清時敢厭烏皮几綵筆從教白髮生和壁抱
來三獻後也知終不負連城之燕京別同遊
諸子云此別不成久如何客淚長有懷依寸
草無地獻長揚白石憐同病青山戀故鄉應
知朗月夜玄度憶難忘泗上逢殷無美下第
歸云君才仍偃蹇吾道轉堪疑泗水浮萍合
春風弱柳垂異鄉聊慰藉千里足相思不是
無楊意文章喜鬢絲子建寄謝少庶方君在

云風波一失所良晤續何難芳草無心綠遊
人不柰看青山歸謝朓黥水滯方干轉覺孤
懷迥春光半已殘寄黃淳甫云計別知非久
孤懷自莫寬花林初過雨蘭渚重生寒混世
甘魚服逢人笑鵷冠何如江表客寂寞老漁
竿彭城別蘇君昭云莫三河流樹色分紅亭
綠酒暫同居天涯春滿王孫草馬首晴開海
岱雲蕭縣烏啼人欲別沛宮花落月初曛臺
前卽是風塵路南北淒其失鴈群泗上逢周
公瑕云大河古驛遶春流共向天涯拂敝裘

柳色樓頭歸燕子草青臺畔駐驂騮愁來天
地惟盃酒老去風塵只蒯緱此日君王方下
士黃金先為郭生求仲嘉送歐楨伯赴國博
云昭王臺枕薊門城騮馬乘春結轡行掌故
舊推秦博士談經今見魯諸生河流萬里沙
爲磧郢曲千秋雪有聲聞道中原盛文雅升
壇應賴主齊盟送族叔子建歸吳云臨岐把
袂一沾巾裘敝誰憐季子貧白石猶聞歌掩
骭青山何意戀閒身情懸去住同爲客家擬
江鄉未卜隣世路浮雲君自見素衣莫遣化

緇塵偕沈君典登敬亭山云名郊有約共休
文出鄆烟霞半屬君竹裡開尊移白日檐端
團蓋宿晴雲畦鋤菜甲山僧供飯煮雕胡法
喜分欲吊青蓮無處所招蒐空擬楚江濱病
起得方一獻成吳二虎臣枉教諸什云夜雨
將愁起因君暫解顏詩投雙白壁人卧一青
山偃蹇甘貧病蓬蒿斷往還飛揚驚雪色三
月滿吳關沈以丁丑邂逅燕都是歲舉進士
第一其莫愁湖詩云盧家歌舞空明月賦客
乘秋此並來一曲晴湖涵睥睨千山落日照

樓臺移尊自動青雲色抽筆還驚白雪才河
朔風流堪寄興繁華六代總塵埃九日獨登
敬亭絕頂懷朱比部及同遊諸子云蓮華雙
漿莫愁湖余曾有蓮華雙
盃舟來之句此日登臨意與俱
千古敬亭者不厭謫仙人去白雲孤澄江露
冷堪龍卧疊嶂風高聽鴈呼二水三山秋色
遍知君何處醉茱萸

歐楨伯博士名大任南海人少與梁比部公
實黎秘書惟敬梁廷評彥國結社山中以貢
入京授江都教諭遷光州學正聞母疾棄官

歸服除遷國子博士為人慷慨負義不為儒
生尋摘章句其大槩具王中丞浮淮序中余
丁丑入計謁楨伯繡佛齋中邵長孺適在寓
楨伯出酒為歡意氣甚相許可贈余詩云新
年逢計吏大郡得雄才學豈巴渝曲歌從燕
薊來春秋將入對旦夕具銜杯知奏文翁最
諸生待爾回余還蜀贈詩云前殿春開五丈
旗諸侯班瑞寵行時政成小苑栽桃竹賦就
東樓擘荔枝巴岳雪消飛騎遠岷江濤起掛
帆遲翰音朱博君差勝更有風流蜀郡詩都

下和荅潼關見寄云百二關城借使權河山
半在節樓前仙人掌上浮雲過玉女池頭片
石猶好幾家留筆札中原何地問橐鞬側
金馬嘶驪駒遠沉陸金門祗自憐楨伯雖以
爲然海鶴雲鴻神志固遠會惟敬掛冠
意落落嘗擬拂衣去然今公卿愛才禮
士知伯者不少恐當不得賦遂初也楨伯
詩有浮淮輶中南嶺北轅諸稿多不錄錄所
未刻數章及浮淮集叙可以知楨伯矣荅張
助甫涼州見寄云涕淚搥書手自題故人偏

憶庾安西孤城落日臨青海千騎浮雲過月
氏射石不妨能飲羽閑關何事更九泥越吟
僅得餘雙髻莫向風塵問執珪送金子魯督
學楚中云文藻風流爾獨雄傳經寵借省曹
中明珠今出隋侯握白雪深知郢客工游獵
堪誇雲夢澤題詩應滿祝融宮五花斲向都
亭別一躍還看氣似虹司馬曾公澹然齋翫
梅云尺書邀賞鳳城隈獻歲春從淑氣回齋
裡花停羗管奏尊前雪待郢歌來上林漸及
芳菲日東府今推賦詠才獨有何郎驚節序

十年官閣興偏催

仁聖太后壽日午門酺燕云內殿承歡步輦趨
九枝燈裏六龍扶陛前萬國朝方岳闕下千
官慶大酺膳使頒分青豹髓酒人擎出紫駝
酥金門愧似東方朔三沐

皇恩在漢都浮淮集叙云當

世宗時六七大夫講業燕中而不佞謬名能私
其緒居無何相繼得罪斥謫或自引去天下
操觚之士避之吻蔭外而南海歐大任先生
獨好其言以為足當我歐先生於書無所不

窺其大要非兩京建安而下至開元亡述也
其疑屢遍戶闔業非以六七大夫亡當也歐
先生授經為南海諸生甚著竟不第而遊燕
一日而傾燕之士人而竟無能薦之者為學
官江都會淮以南鮮雅慕歐先生默默不自
得益肆其力於文章其文章益高然度以自
媿快而已而會不佞強起過江都六七大夫
非物故則亦起旬日而過江都者二三輩歐
先生懽甚出一編相示曰此吾所自媿快者
也環吾齋樹首簪而以畝計晨光蕭然旬而

而首管無汝徑者則以轍迹寡也吾編成而
整綱其首晨始拂拭者為子也子其序之不
佞竟讀乃曰歐先生而亦知而世乎哉世類
重顯位而歐先生仕僅一命為學官世急材
而輕儒自茲而南粵而歐先生操五寸管從
吾鄉之幾世好慕俠長者游而歐先生所欲
獨當六七大夫咄嗟吾見而之曰以窮也歐
先生曰不然也吾嚮者下彭城度淮而後南
也渺乎若瓠落而無所用之割以為五石尊
汎汎乎江湖而不知其止也彼豈以為有所

直哉必有所直而後稱適則亦晚矣且昔司
馬子長二十而游江淮上會稽闕九疑危困
鄢薛彭城時豈有六七大夫足知者吾得長
為我足矣於是名其集浮淮而不佞序其意
淮以南有宗子相臣者是六七大夫中人也
而天往御史檄歐先生采淮賢大夫集歐先
生檄諸邑學官顧獨遺子相歐先生意不憚
也曰豈可以當吾世而失子相乃為宗臣傳
上太史具集中嗚呼歐先生無負淮矣

李襲美一字于美名蔭南陽內鄉人襲美為

子時從其兄太史子田游白下陳子楚為
余誦襲美詩余恨不從之游也會丁丑入計
都門襲美為赤縣宰從王大僕見余詩因存
余客邸於是得以詩相往還然竟不及一面
也余出都門止弘法寺約孔昭為西山遊襲
美乃走書約余共往書甫至襲美携酒來因
共握手大歡引酌劇談至夕乃罷明日余與
孔昭遊會襲美有他祀事乃遣人先置酒諸
勝而以詩來報於是孔昭與余且游且酌酌
已復味既歸余叙其事而錄二人詩以歸襲

美襲美因和之為刻西山倡和編寄余甚奇也襲美才足高一世而心顧益虛為詩援筆輒就然於他人詩佳者愛之不啻出其口也尤好延接海內士人有一善輒刺刺從衆人稱之不置意所當無問遠近未嘗一日置念也張助甫在甘州見襲美所贈余詩以書來曰李于美某之年家兄弟也其人意氣蓋一世某向未面而顧有逾骨肉今於門下亦然嗟乎世有白首而新若襲美誼足驅千古寧獨一世也良鄉縣有李北海所書雲麾將軍

碑歲且久學官規

規以為碑置草壤間邵長蘅

偶見之以告黎

惟敬襲美

聞之一夕從良鄉

輦致齋閣為亭庋之而扁其齋古墨士大夫

聞襲美事皆詩歌之又為刻古墨齋集其好

奇嗜古類如此襲美所著有李陽穀詩史隱

軒詩話所贈余詩已見他集其得朱憲使潼

關書云書傳遠道動經旬讀罷依然字色新

今日鍾情還我輩向來詛嶽是何人

註云公書來言

在潼關抱病又

天男女各一

露零仙掌寧滋渴峯削蓮花

不染塵莫使山靈成悵惘好憑吟筆闢嶙峋

送呂山人中甫歸四明云美爾昂藏七尺身
籜冠芒屨遠風塵只疑黃鶴謬前客不作非
熊夢裡人把臂且酣燕市酒羣舟猶及甬江
春刀名雖利成何事樗散偏宜髻髮新春日
同何故圖故範二太史集李子禹宅云馳思
無勞入杳冥問奇同過子雲亭春歸芳樹禽
相媚客有霏談塵詎停雙鬢漸于羈旅白一
尊還對假山清明時雅會非容易太史何嘗
奏德星元夕後二日周民部見過云帝鄉何
幸共彈冠咫尺翻令見面難芳醕喜同今夕

飲花燈猶作上元看雅談頓使塵襟靜春色
平分朔氣寒正是

主惠休沐日不妨傾倒盡餘歡鄭伯良席上同
筆存叔馬遜之作八音體得如字云金門無
舊符公半石戶為農樂自如絲肉漫娛高士
丁公老手謬謫山廬飽尋綠滿能供醉土鼓
聲高可佐錦堂饌芋袍人不識木公東望有
來書送梨梨書歸嶺南云乞歸豈是厭承明
欲向山中采杜鵑興在孤雲多喜色圖開五
岳見真形將因仙驥招王子詎借姬雛壽伏

生別後漫愁鴻鴈少梅花消息遠含情夏日
丘謙之周元孚梅客生李世延集吏隱軒得
風字云吏隱軒開爽氣通晚來花竹媚無
羽衣遙舞中天月塵尾頻揮四座風詞妙
輿狂不減飲從擎筑氣還雄三賓未盡
手况復天涯四美同四月二十日王納言
憲使招同馬山人松泉寺看牡丹
云牡丹零落已無春芍藥猶芳
未須論伯仲花奇真見有君臣
金地冉冉香浮白甃中空虛不
愛顏色相任

教吹作路傍塵是日大風

胡文甫名汝煥洪都人余讀書洪都時文甫

從其父南湖先生居同仁年可十一二見之

娟娟然瑤環瓊珥美好童子也然洪都為舉

子業者則已推文甫文甫又與余弟仲為同

仁會余見文甫舉子業獨有奇氣蓋心服之

文甫庚午舉于鄉又七年計偕入京師歐楨

伯見文甫詩為余嘖嘖誦不輟余以計吏不

卽得謁文甫比事竣授剌郎中文甫知為余

乃出握手叙論往昔然後把余詩讀之余為

西山遊文甫以他事不得往既下第歸洪都
李襲美書責文甫西山詩文甫乃為西山詩
以報襲美且為叙述其意曰李京兆于美朱
太守秉器為余治裝游西山諸刹余方疲于
津梁不得往黃徵君孔昭往之各以歷履諸
勝紀詩若干首事在秉器語中余既歸豫章
于美走書并梓責和展讀數四神情自王風
雅各殊嵐光水色起自據梧竹韻松聲生于
凝壁真藝苑之慧筌詞宗之上乘也余不揣
謹依來玉謬酬俚音附驥之私真可為慰續

貂之誚是所免乎草具如左金山寺燈字云
尋山君自好林路恍然登看竹無論主拈花
不問僧諸天憑指掌半偈了傳燈余亦逃禪
者相從恨未能華嚴寺航字云最是關情地
追陪此上方千峯凌日起一水浸天長遙望
諸陵紫時驅我馬黃到時為彼岼何必問慈
航碧雲寺遙字云古刹倚岩堯峯峯插絳霄
諸天携縹緲雙屐轉逍遙流水如鐘磬長松
似猗猗攀緣忘去住身世半漁樵寶林寺蕭
字云林壑意蕭蕭遊仙去不遙泉飛三竺練

鐘落五湖潮小憇臨空翠高談破寂寥山中
多桂樹莫謂隱難招弘恩寺懷字云思君如
日月朗朗照人懷自謂交難合由來山與諧
營生無長物繡佛有清齋一別經芳草離心
徧九垓香山寺陰字云不禁春到此相憶一
何深自汝開雙逕堪誰賦上林山根晴亦雨
洞口晝長陰盡解遊人意還依靜者心延壽
寺連字云人世真難遇春風一笑前鴻濛開
色界林響落鈞天峽斷雲為水村虛柳是烟
懷君如戀景一步一留連山字云風塵徧徧

吏校屨有名山鼎立文章事昂藏意氣間華
夷天作塹南北燕為關匡濟還公等遊情未
是閑古風贈于美秉器云大行接天亘天起
蜿蜒長城一萬里

天子不聞西擊胡但見遊人似流水成都太守
心自閑宛平京兆風可攀我欲從之行路難
遙望白雲永長嘆送秉器于美西遊諸剎因
志近感云遙望旌旗指翠微吏情真與世情
違飄然五馬同杯渡去矣雙鳬傍錫飛白雪
自高同調寡青山不改故人稀浮生天地終

為寄采盡芙蓉亦當歸其六郡良家子云六
郡良家子翩翩意氣雄結營當大白吹劍拂
長虹心折胡塵外名高漢殿中請纓君等事
長揖莫論功秋日答張幼于云登高望四海
藹藹見停雲何物真如練相思疑是君愁從
今日至書以故人聞一葉猶千里關河落鴈
紛康裕卿黃孔昭郡長孺何仁仲集盛泰甫
宅得隈字云北斗近城隈西山照酒杯無妨
車馬地不是俠邪來白雪于今事黃金自古
臺平生多感慨臨眺獨徘徊又得遠字云意

氣看如此滄洲諒不遠同聲歌一曲千里和
應稀寒月當尊墮春雲傍酒飛長安無限景
偏照薜蘿衣秋懷似潘文學云北斗插天天
欲斜水樓殘夜蕩荷花雲流廬嶽杯當手月
泛銀河客在槎三輔故人猶蔓草兩湖秋水
已蕪葭安仁更有閑居賦莫遣星霜到鬢華
答張伯起見訪京邸之作云尊前曾問白鷗
狂何意萍蹤又帝鄉葭莢東吳人是陸星槎
南斗客為張相看髣髴蕭蕭短一說肝心字
字長握有薊綬操不得知君袖裡是干將同

康裕卿陳忠甫黃公補公紹蔣兆卿人日集
盛泰甫宅得年字云黃金諸子盡翩翩長見
飛翻綵筆前春色更逢人日好寒光猶借客
星懸時名一附三千牘意氣何須十萬錢尚
有小山招未得攀緣桂樹不知年卽景口占
呈魏父佳父二仲云無數飛花欲暮春萋萋
芳草倍憐人吳鉤翠削芙蓉麗楚服青裁薜
荔新三逕祇緣何客掃一尊偏向故交親談
天况是高陽侶遮莫風流藉角巾集張徵君
節伯宅得侯字云長鋏歸來且敝裘一尊寒

色共江流村當白社尋高士人在青山拜隱
侯三楚樓臺明月夜五陵烟樹碧梧秋投珠
何地無知己不謂風塵已倦遊

河上楮談卷之三終